

明孝宗實錄

卷九十一至一四四
弘治七年八月至
十一年閏十一月

明孝宗敬皇帝實錄卷之九十一

弘治七年八月丁巳朔釋奠先師孔子遣太子太保禮部尚書
兼武英殿大學士劉健行禮○戊午祭大社大稷○監察
御史張縉言張家灣至京城一路實為京師要衝凡入貢軍需
糧運以至商賈經營官民趨赴率皆由此但橋梁坍塌道途低
窪一經淫雨水積不流今者糧運赴京車陷不前以致腳價翔
貴白晝之間盜賊乘之出沒無籍之徒故坎平地使泥濘車陷
因以為利乞勅該部量撥軍夫委官專管并行通州巡倉御史
往來提督削平填墊旁用石砌中以土雜瓦礫築實外開溝渠
以通水道所用大石定為則例募人收買給與冠帶或預行各
處軍民運船帶納磚石足用然後與橋梁併工修理仍下所司
時加覈補歲令巡城御史每於季首由京城至張家灣巡視一

次仍有盜石坎土者從重究治工部覆奏從之○己未賜楚府輔國將軍均鉢庶長子名曰榮濟庶第二子名曰榮道韓府輔國將軍徵鎖庶第二子曰偕灌晉府輔國將軍奇斌第三子曰表拓第四子曰表械奉國將軍表統第八子曰表橘○庚申貴州鎮巡等官奏近者勦平苗賊土官宣慰彭世麒楊愛等皆與有勞然難於加秩請各賜勅獎諭從之○兵部覆奏兵科給事中周旋所奏近各邊失機止罪其下而鎮巡官每蒙矜宥且奏報多隱匿以致將驕卒情夷狄無所畏忌請自今邊方殺虜人口積至二十以上刼掠孳畜二百以上者鎮巡官當任其罪若隱匿及奏報不實者鎮巡以下俱論以欺罔從之○改湖廣都司都指揮高俊為中都留守司正留守○辛酉先是天津等八衛被水弘治六年秋青草令折納三運本色四運至是委官主

事李憲言本色尚欠三運無從採納請並從折徵例戶部覆奏從之○是日已刻西方流星大如盞色赤黃光燭地自中天西行至近蜀尾跡炸散○大同府空中有大塊大如斗自東北派至西南墜地有聲頃之化白氣一道良久散○壬戌裁革順天府宛平縣清澄高梁二間官各一員○戶部請以太倉銀折給在京衛所監局官軍人等九月俸糧每石折銀五錢其冬三月俸糧請各先一月預給以平米價從之○命西寧侯宋愷神機五千坐營管操○癸亥陞江西布政司右叅政魏瀚為本司右布政使湖廣按察司僉事戚昂為貴州副使○甲子兵部覆奏監察御史田翕所陳省擾驛傳事謂馳驛之擾惟各王府所差人員特甚請照成化十六年例今後王府除進表謝恩外每歲春秋止許奏事二次常事必積至五六起以上乃許類奏如王

府在省城者必經布政司在府州者必經府州皆稽考無礙然後許起關文如長史冒奏各驛濫應者並坐以罪從之○增設花馬池守禦千戶所正副千戶各一員百戶十員所鎮撫一員吏目一員從寧夏守臣奏也○整飭薊州等處邊備都御史看勲奏故豬園頭關平漫難守關之北三里曰北水谷南八里曰南水谷成化中各因山增設二關險要可守但區畫未備請於二關內加修城築增墩堡摘守備官軍分守其中因耕其隙地以足軍食兵部覆奏從之○裁革直隸崑山縣寧海驛○乙丑內閣大學士徐溥丘濬劉健三年秩滿 上降手勅溥加少傅兼太子太傅吏部尚書謹身殿大學士濬加少保兼太子太保戶部尚書武英殿大學士健陞太子太保兼禮部尚書武英殿大學士溥等同具疏辭 上曰卿等輔導有年特加陞秩宜盡心

供職所辭不允○命秦府庶人公鈞妻張氏公鑒妻潘氏公鈞妻楊氏公鑒妻張氏誠滙妻陳氏故庶人志壇妻薛氏各月支口糧三石公鈞次子誠受公鈞公鈞公鈞各幼女一人人月支口糧米麥一石五斗○初直隸河間府歲徵絹八百九十疋以備各衛官軍折俸每疋民費銀一兩有餘至官軍支出賣銀每疋不過五六錢至是本府請每疋折徵銀八錢而以六錢給官軍其餘二錢蓄之以備賑濟戶部議民以蠶桑為業若永從折徵例是導民以惰第今災傷之餘姑暫行一年以後仍徵本色從之○是日曉到南京老人呈見丙位色赤黃○丙寅孝慈高皇后忌辰上祭奉先殿魏國公徐浦承命祭孝陵○廣東按察司僉事傅金丁憂服闋復除湖廣按察司○春刻月犯鍵星○丁卯陞貴州按察司副使俞俊為江西布政司

右叅政以預平苗寇功也○裁革陝西臨洮鞏昌二府管水利
通判各一員○戊辰遣戶部右侍郎佺鐘祭太倉之神○遣順
天府官祭宋丞相文天祥○以興王將之國命工部右侍郎謝
綬并兵部郎中一人於通州整視舟車夫役○巡按監察御史
田翁奏吉王近為故妃守墓者乞田奉旨令湖廣守臣撥近墳
無糧地五頃近墳田未有無糧者無從撥給上復命已之○
陞雲南按察司僉事周鳳為貴州副使○命四川都司都指揮
僉事張寧守備叙瀘等處○中都留守司都指揮僉事董昂河
南都司都指揮僉事劉軻大寧都司都指揮僉事龐通山東都
司都指揮僉事楊勝俱以所部京操官軍數少下刑部獄各贖
杖還職○己巳兵科給事中周旋奏比年以來書繪雜派技藝
工作紛然並進陛下即位之初罷興傳奉中間雖留數人皆

降級而不任以事所以重惜名器甄別流品也六七年来傳奉
獲行中外咸謂陛下圖治之心少替於昔臣知陛下非變
其初心也意者憫其供事之久而欲加之恩耳然此輩貪得之
心何有厭足如往日黃忠杜裕賁錄不通數人而張玘李綸輩
遂至三十餘人玘綸輩傳陛下諭一日而李璫朱俊德又求加
級恐自今以往前日授間之人皆引類而起矣乞今後有供事
年久必欲賞勞之者亦當立為成法文職付吏部武職付兵部
籍其姓名量其資序拘以六年九年文職則陞官一級而不加
俸使不治民事者不得以耗財用武職則加俸一級而不陞官
使無軍功者不得以冒爵秩章上不聽○授進士柯拱北為翰
林院檢討侍親王講讀○內閣大學士徐溥等奏文職誥勅原
係內閣掌行近年以來內外各衙門官員漸多名職降例人各

不同臣等參預機務事體繁重不暇致詳別無專官管理前後
奏積動至數百道每撰寫進呈後類送中書舍人書寫吏部奏
請頒給一年僅得一二次各官應給誥勅者多因父母年老日
夜懸望欲沾一命不能猝得或朝不保暮道恨終身按正統年
間王直係侍郎兼學士職事專管內閣誥勅今惟太常寺少卿
兼翰林院侍講學士李東陽文學優贍兼且歷任年深乞量陞
一職令在內閣專管誥勅庶委任專一事不稽誤得旨李東陽
陞禮部右侍郎兼翰林院侍講學士專管誥勅日講官少詹事
陸簡陞詹事府詹事兼侍讀學士程敏政太常寺卿左庶子張
昇少詹事俱兼侍講學士照舊辦事○庚午陞刑部員外郎胡
榮為雲南按察司僉事○南京太僕寺少卿呂憲言三事一曰
重王輔謂近日宗屬親王多有失德固緣生長貴富未知憂懼

亦其輔導等官失職所致國初王府官寮初則遴選而後亦陸續陞用是以志向自高輔導不苟令長史教授類皆一任終身是以豪傑之士皆不願往既勉強就任鮮不阿逢以求寵養欲其有所匡正難矣乞勅吏部今後王府長史非進士有名望者不除教授非教官有學行者不選待歷任六年九年其輔導王無過舉者一體擢用庶人知激勵而有匡輔之益二曰戒貪殘謂官之貪殘在激勵之失其道激勵之失大畧有三立格太拘限年太速論賊太寬今府州縣官有政績得顯用者惟進士為然舉人次之至歲貢吏員則雖有異政亦少見顯用禮謂七十致仕今惟京官六十以上有在任者若外官雖有長材潔操亦以年老罷歸至於貪殘官情狀已露問刑者憫之往往減從輕論此輩得志初無愧耻人皆以為為善無榮為惡無辱所以

貪殘日甚乞今後考其政績卓異者雖歲貢吏員一體擢用年
過六十亦仍存留至於貪污事發雖進士舉人亦依律重治庶
貪殘可以少止三曰久奏任謂國家內外之諸多仰東南而巡
撫蘇松等府都御史之任最重臣聞前尚書周忱為江南巡撫
之冠然忱之始至亦有周白地之謗至末年始有米鋪地之謠
可見久於任而政始成也今巡撫屢遷往往有未知地方利弊
而去者乞今後巡撫都御史務推舉得人俾之久任如當獎異
止加爵秩如漢增秩故事則民瘼可蘇章下吏部言王府官舊
不化轉此例不可飭更資格限年及貪殘之弊宜申明戒諭兩
京大臣員缺類於各處巡撫推陞如江南巡撫獨緣此不與推
列似於物論不平宜於推舉之際明跡歷年深淺奏請從之○
孝未禮部進 興王之國禮儀一沿途合祭神祇近者王皆親

祭遠者望祭仍先遣奉祀官灑掃社稷山川壇及旗幟廟預備
祭物王將到國前三日致齋及至城外本處文武官率耆老出
城迎候引王詣社稷山川壇祭祀各官及耆老隨班陪祭禮畢
送王至宮陛殿行慶賀禮一是日設儀仗于露臺上下之東西
設大樂于露臺上東西北向陳金鼓旗於承運門外軍職官員
各守殿及王城門仍設文武官員拜位於丹墀文東武西設贊
禮官二員於文武官員拜位之北東西相向護從執事等官先
詣圓殿後候與服官啓請王具冕服訖與儀贊執事者先行四
拜禮畢各就位與儀啓請王陛殿導引官前導大樂作陛座訖
樂止贊排班引禮引文武官就拜贊班齊鞠躬樂作平身樂止
引禮引班首陛自東階由殿東門入至殿中贊跪外贊同贊跪
班首衆官皆跪班首致詞云某官某等敬惟殿下欽承 上命

至國之初禮當慶賀如係王府官則稱臣某等後同內外同贊
俯伏興班首舉官皆俯伏興引禮引班首復位贊鞠躬樂作四
拜平身樂止興儀詣殿中跪啓禮畢樂作導引王遜宮樂止各
官以次出凡遇大慶賀禮儀俱同惟致詞隨換○南京戶部員
外郎牛通貪鄙無狀先承委管內府九庫錢帑復求蕪管皇城
四門倉糧尚書秦紘惡其所為別委員外郎余完代之通移怒
于完日夜詬罵不已完與通居隣素畏其暴乃訴紘求代紘不
從又欲訴于總督糧儲都御史通乃率二子持挺至完家欲撻
之無造閭門醜語以汚其妻女完不勝忿懣遂自刎死南京科
道交劾之事下南京法司雜考治獄上謂通罪律止贖杖還職
然行止有虧不可以汚仕籍因并劾紘馭屬不嚴之罪 上以
通先惡威逼同僚至死情重律輕命不必納贖并妻子發四川

建昌衛充軍紘罰俸兩月○乙亥周府聊城王安滑荒王周王庶第十五子母妃高氏成化十二年生先封鎮國將軍弘治二年冊封聊城王至是薨年二十計聞輟朝一日賜祭葬如制謚曰懷和○丙子禮部言弘治九年當會試天下舉人而有爾供給止取辦於京畿諸府請行浙江江西湖廣四川福建各取鄉試所用餘銀一百兩山東山西河南陝西及應天府各八十兩以助其費且請增執事官三員膳錄生員二百名從之○酉刻日生右珥色赤黃○丁丑遣官祭太歲風雲雷雨嶽鎮海瀆山川等神○遣旗手衛官祭旗纛之神○戊寅 憲宗純皇帝忌辰 上祭 奉先殿遣駙馬都尉游泰祭 茂陵○命間住錦衣衛百戶邵安邵喜各復職不為例二人皆興王母貴妃邵氏弟從王請也○夜南京地震○己卯四川欽州府自春以來民

間大疫死者三十餘人至是巡撫都御史梁璟奏至下所司知之○庚辰廣東布政司左叅政姜英丁憂服闋復除原職○修南京太廟社稷壇孝陵殿宇廊廡廚庫及明樓碑亭等處以近為風雨所壞也○辛巳陞山西按察司僉事王存禮為四川副使○雲南蒙化府土官知府左銘奏稱祖母張氏自其祖父剛死後守節無玷乞賜旌表以勵夷俗下雲南布政司覆勘如所奏禮部仍議行風憲官覈實上曰夷方節婦誠所難得張氏守節實跡所司既已勘實即與旌表以勵其俗不必再覈○是日晚刻月犯軒轅右角星夜金星犯軒轅左角星○壬午興王請撥賜工匠十五名上命湖廣守臣照例於京班工匠內每名各歲撥三名赴府供役○癸未復除故大學士劉珝之子銳為中書舍人銳成化二十年蒙恩授職以時方幼穉未

能供事後翊致仕隨侍以歸至是赴部乃命復職○命改陝西都司都指揮使丘鳳之子鉞襲西安前衛指揮使○甲申大通事錦衣衛帶俸指揮僉事王英奏朝廷設哈密衛當諸夷通路每歲各處回回進貢者至此必令少憩以館穀之或遇番寇劫掠則人馬亦可以接護柔遠之道可謂至矣今連壇阿黑麻悖逆天道二次犯邊朝廷不即加罪仍撫之以恩阿黑麻不思悔禍乃復奪城池劫金印執陝巴跡其所為背逆益甚聞罕東左衛居哈密之南相去止三日野乜乞里居哈密之東北相去止二日是皆唇齒之地阿黑麻於去歲八月內約哈密守城頭目牙蘭遣使至罕東左衛都督只克處脅令投順只克不從野乜乞里原屬哈密今與阿黑麻讐殺阿黑麻又曾殺其頭目罕乃法思其弟大者賽亦子密兒賽亦皆思報怨又與其父頭目阿